

四庫未收書輯刊編纂委員會編

四庫未收書輯刊

北京出版社

貳輯·貳拾伍冊

四庫未收書輯刊

四庫未收書輯刊編纂委員會編

北京出版社

貳輯・貳拾伍冊目錄

明大司馬盧公奏議十卷〔明〕盧象昇撰

一

奏疏存藁六卷〔清〕趙良棟撰

二七五

兩江總督怡良奏稿不分卷〔清〕怡良撰

五三三

〔明〕盧象昇撰

明大司馬盧公奏議十卷

清道光九年刻本

道光己丑仲秋

明大司馬盧公奏議

祠堂藏板

欽定四庫全書總目提要集部別集類

忠肅集三卷 江蘇巡撫採進本

明盧象昇撰盧象昇字建斗宜興人天啓壬戌進士官至兵部尙書崇禎戊寅

大兵下鉅鹿象昇督師戰敗歿于陣乾隆四十一年

賜諡忠肅事蹟具明史本傳象昇奏疏凡六集其姪孫

豪然嘗彙刻別行今未之見此則其詩文集也初

刻於康熙戊辰爲其幼子天馭孫聲諧所編萬錦

雯序之後其曾孫安節又搜羅遺墨補苴此本第

一卷爲詩三十五首詩餘八首傳一首墓誌一首

欽定四庫全書總目提要集部別集類

詩餘末一首爲七夕歌蓋古詩誤編實得詩三十

六首詩餘七首也第二卷爲記一首書二十七首

第三卷爲明史列傳年譜世表詩文皆有註不著

姓名觀所註鹿善繼傳言及楊嗣昌死事則非象

昇自註矣其年譜之註題四世孫師儉作此註殆

亦出其手與象昇年二十三登第洎年二十九卽

戰鬪於流寇之間死時年僅三十九蓋未暇專力

文藝故詩古文多不入格然讀其軍中家書尺牘

忠孝悱惻使人感動無意爲文而能文者莫加焉

雖謂之載道之文可也楊嗣昌媚嫉怙權擠象昇

以至於死嗣昌卒亦身敗名裂其子所作孤兒顛

天錄雖巧辯百端公論卒不可掩藏書家亦多不

肯收錄而象昇遺集至今留天地間錄而存之亦

聖朝敦崇風教扶植綱常之義也舊本題曰忠烈集蓋

用明福王時舊諡今旣蒙

特典褒榮光垂千古謹改題所

賜新諡昭表章之至意焉

欽定四庫全書總目提要集部別集類

二

奉

天承運

皇帝制曰取義成仁式著艱貞之烈易名表行爰昭
獎恤之公眷致命之可風曩跡未湮於異代期扶
綱之攸賴休稱允協於千秋爾故明督師兵部尙
書盧象昇砥行能堅秉誠克裕遭時坎坷恒仗節
以無撓殉義從容竟捐生而不悔朕覽披信史軫
念忠微予褒顯於崇祠用隆秩祀示表章於往籍
載錫嘉名象厥生平謚爲忠肅於戲溯流芳於頑
廉懦立節或重於泰山彰定論於世遠風微榮更

祭文

逾於華哀幽光特闡鑒當年儼日之心正氣咸伸
勵萬古疾風之節欽茲懋典慰爾英靈

乾隆四十一年 月 日

凡例

一 豪然刻本凡十二卷題曰忠節全編茲卽其本及盧
氏家藏疏稿校勘付梓

一 盧氏家藏疏稿十卷與忠節全編畧同惟分卷稍異
耳公移文檄概從刪汰篇中緣起可節者亦從省有
刪無增

一刻本及稿本標題但採緣起首句往往不得篇中要
領嘉慶十八年所刻聚珍版同今於可從者從之不
可從者別製標題

一 公以崇禎七年撫郿八年五月撫楚十月總理直隸
凡例

河南山東川湖軍務九年總督宣大山西軍務刻本
稿本編次一依歷官前後今仍之惟宣大奏議自十
一年八月以後全缺刻本亦然海內有收藏者更俟
續補

一 稿本中有投揭行牌告示應存者均附於各任奏疏
之後又稿本詩文頗夥未暇全刻擇其尤者附於全
書之後

一 乾隆四十一年奉 旨賜諡忠肅而舊本詩文俱題
忠烈公集蓋仍前明舊謚也茲但書銜不復仍用舊
謚

一楊文正公所撰盧公事實一卷乃崇禎十二年送公歸葬途次所斬一字不敢增損附刻於後

凡例

二

本傳

明史

盧象昇字建斗宜興人祖立志儀封知縣象昇白晢而臞膊獨骨負殊力舉天啓二年進士授戶部主事歷員外郎稍遷大名知府崇禎二年京師戒嚴募萬人入衛明年進右參政兼副使整飭大名廣平順德三府兵備號天雄軍又明年舉治行卓異進按察使治兵如故象昇雖文士善射嫻將畧能治軍六年山西賊流入畿輔據臨城之西山象昇擊卻之與總兵梁甫參議寇從化連敗賊賊走還西山圍遊擊董維坤冷水村象昇設伏石城南大破之又破之青龍岡又破之武安連斬賊魁本傳

十一人殲其黨收還男女二萬三郡之民安堵者數歲象昇每臨陣身先士卒與賊格鬪刀及鎗勿顧失馬卽步戰逐賊危崖一賊自巔射中象昇額又一矢僕夫斃馬下象昇提刀戰益疾賊賊走相戒曰盧廉使遇卽死不可犯象昇以是有能兵名賊懼南渡河明年賊入楚陷鄖陽六縣命象昇以右僉都御史代蔣允儀撫治鄖陽時蜀寇返楚者駐鄖之黃龍灘象昇與總督陳奇瑜分道夾擊自烏林關也家溝石泉壩康寧坪獅子山太平河竹木砭箐口諸處連戰皆捷斬馘五千六百有奇漢南寇幾盡因請益鄖主兵減稅賦繕城郭貸鄰郡倉

穀募商採銅鑄錢郎得完輯八年五月擢象昇右副都御史代唐暉巡撫湖廣八月命總理江北河南山東湖廣四川軍務兼湖廣巡撫總督洪承疇辦西北象昇辦東南尋解巡撫任進兵部侍郎加督山西陝西軍務賜尙方劔便宜行事汝洛告警象昇倍道馳入汝賊部衆三十餘萬連營百里勢甚盛象昇督副將李重鎮雷時聲等擊高迎祥於城西用強弩射殺賊千餘人迎祥李自成走陷光州象昇復大破之確山先是大帥曹文詔艾萬年陣亡尤世威敗勦諸將率畏賊不敢前象昇每慷慨灑泣激以忠義軍中嘗絕三日餉象昇亦水漿不

本傳

二

入口以是得將士心戰輒有功九年正月大會諸將於鳳陽象昇乃上言曰賊橫而後調兵賊多而後增兵是爲後局兵至而後議餉兵集而後請餉是爲危形況請餉未數兵將從賊而爲寇是八年來所請之兵皆賊黨所用之餉皆盜糧也又言總督總理宜有專兵專餉請調咸寧甘肅之兵屬總督薊遼關寧之兵屬總理又言各直省撫臣俱有封疆重任母得一有賊警卽求援求調不應則吳越也分應則何以支又言臺諫諸臣不問難易不顧死生專以求全責備雖有長材從何展布臣與督臣有剿法無堵法有戰法無守法言皆切中機宜

於是迎祥圍廬州不克分道陷含山和州進圍滁州象昇率總兵祖寬遊擊羅岱救滁州大戰於城東五里橋斬賊首搖天動奪其駿馬賊連營俱潰逐北五十里朱龍橋至關山積屍填溝委塹滁水爲不流賊乃北趨鳳陽圍壽州突穎霍蕭碭靈壁虹窺曹單總兵劉澤清拒河乃掠考城儀封而西其犯毫者折入歸德永寧總兵官祖大樂邀擊之賊乃北向開封陳永福敗之朱仙鎮賊遂走登封與他賊合分趨裕州南陽象昇合寬大樂岱兵大破之七頂山殲自成精騎殆盡已次南陽令大樂備汝寧寬備鄧州而躬率諸軍蹙賊遣使告湖廣巡

本傳

三

撫王夢尹鄖陽撫治宋祖舜曰賊疲矣東西邀擊前阻漢江可一戰殲也兩人竟不能禦賊遂自光化潛渡漢入鄖象昇遣總兵秦翼明副將雷時聲由南漳穀城入山擊賊寬等騎軍不利阻隘副將王進忠軍譁羅岱劉肇基兵多逃追之則彎弓內嚮象昇乃調四川及葶子土兵搜捕均州賊是時楚豫賊及迎祥等俱在秦楚蜀之交萬山中象昇自南陽趨襄陽進兵賊多兵少而河南大饑餉乏邊兵益洶洶承疇象昇議關中平曠利騎兵以寬重鎮軍入陝而襄陽均宜穀上津南漳環山皆賊七月象昇渡浙河而南九月追賊至鄖西京師戒嚴

有詔入衛再賜上方劔既行賊遂大逞駸駸乎不可復制矣既解嚴詔遷兵部左侍郎總督宣大山西軍務大興屯政穀熟畝一鍾積粟二十餘萬天子諭九邊皆式宣大明年春聞宣警卽夜馳至天城矢檄旁午言二百里外乞炭馬蹄闊踏四十里象昇曰此大舉也問入口乎曰未象昇曰殆欲右窺雲晉令我兵集宣則彼乘虛入耳因檄雲晉兵勿動自率師次右衛戒邊吏毋輕言戰持一月象昇曰懈矣可擊哨知三十六營離牆六十里潛召雲師西來宣師東來自督兵直子午出羊房堡計日鏖戰乞炭間之遂遁象昇在陽和乞炭不敢近邊

本傳

四

五月丁外艱疏上乞奔喪時楊嗣昌奪情任中樞亦起陳新甲制中而令象昇席喪候代進兵部尙書新甲在遠未卽至九月

大清兵入牆子嶺青口山殺總督吳阿衡毀正關至營城石匣駐於牛蘭召宣大山西三總兵楊國柱王樸虎大威入衛三賜象昇尙方劔督天下援兵象昇麻衣草履誓師及郊馳疏報曰臣非軍旅才愚心任事誼不避難但自臣父奄逝長途慘傷潰亂五官非復昔時兼以草土之身踞三軍上豈惟觀瞻不聳九虞金鼓不靈已聞總監中官高起潛亦衰經臨戎象昇謂所親曰吾三

人皆不祥之身也人臣無親安有君樞輔奪情亦欲子變禮以分魯耶處心若此安可與事君他日必面責之當是時嗣昌起潛主和議象昇聞之頓足歎曰子受國恩恨不得死所有如萬分一不幸寧捐軀斷脰耳及都帝召對問方畧對曰臣主戰帝變色良久曰撫乃外廷議耳其出與嗣昌起潛議出與議不合明日帝發萬金犒軍嗣昌送之屏左右戒毋浪戰遂別去師次昌平帝復遣中官齎帑金三萬犒軍明日又賜御馬百太僕馬千銀鐵鞭五百象昇曰果然外廷議也帝意銳甚矣決策議戰然事多爲嗣昌起潛撓疏請分兵則議宣大山

本傳

五

西三帥屬象昇關寧諸路屬起潛象昇名督天下兵實不及二萬次順義先是有瞽而賣卜者周元忠善遯人時遣之爲媾會嗣昌至軍象昇責數之曰文弱子不聞城下盟春秋恥之而日爲媾長安口舌如鋒袁崇煥之禍其能免乎嗣昌頰赤曰公直以尙方劔加我矣象昇曰旣不奔喪又不能戰齒劍者我也安能加人嗣昌辭遁象昇卽言元忠請款往來非一日事始於薊門督監受成於本兵通國聞之誰可諱也嗣昌語塞而去又數日會起潛安定門兩人各持一議新甲亦至昌平象昇分兵與之當是時象昇自將馬步軍列營都城之外衝

鋒陷陣軍律甚整

大清兵南下三路出師一由涑水攻易一由新城攻雄一由定興攻安肅象昇遂由涿進據保定命諸將分道出擊大戰於慶都編修楊廷麟上疏言南仲在內李綱無功潛善秉成宗澤殞恨國有若人非封疆福嗣昌大怒改廷麟兵部主事贊畫行營奪象昇尙書侍郎視事命大學士劉宇亮輔臣督師巡撫張其平閉關絕餉俄又以雲晉警趣出關王樸徑引兵去象昇提殘卒次宿三宮野外畿南三郡父老聞之咸叩軍門請曰天下洵洵且十年明公出萬死不顧一生之計爲天下先乃奸

本傳

六

臣在內孤忠見嫉三軍捧出關之檄將士懷西歸之心棲遲絕野一飽無時脫巾狂噪雲帥其見告矣明公誠從愚計移軍廣順召集義師三郡子弟喜公之來皆以昔非公死賊今非公死兵同心戮力一呼而裹糧從者可十萬孰與隻臂無援立而就死哉象昇泣然流涕而謂父老曰感父老義雖然自予與賊角經數十百戰未嘗勦今者分疲卒五千大敵西衝援師東隔事由中制食盡力窮旦夕死矣無徒累爾父老爲也衆號泣雷動各攜床頭斗粟餉軍或貽棗一升曰公煮爲糧十二月十一日進師至鉅鹿賈莊起潛擁關寧兵在雞澤距賈

莊五十里而近象昇遣廷麟往乞援不應師至蒿水橋遇

大清兵象昇將中軍大威帥左國柱帥右遂戰夜半聲策聲四起旦日騎數萬環之三匝象昇麾兵疾戰呼聲動天自辰迄未礮盡矢窮奮身鬪後騎皆進手擊殺數十人身中四矢三刃遂仆掌牧楊陸凱懼衆之殘其屍而伏其上背負二十四矢以死僕顧顯者殉一軍盡覆大威國柱潰圍乃得脫起潛聞敗倉皇遁不言象昇死狀嗣昌疑之有詔驗視廷麟得其屍戰場麻衣白網巾一卒遙見卽號泣曰此吾盧公也三郡之民聞之哭失

本傳

七

聲順德知府于穎上狀嗣昌故靳之八十日而後殮明年象昇妻王請恤又明年其弟象晉象觀又請不許久之嗣昌敗廷臣多爲言者乃贈太子少師兵部尙書賜祭葬世廕錦衣千戶福王時追諡忠烈建祠奉祀象昇少有大志爲學不事章句居官勤勞倍下吏夜刻燭雞鳴盥櫛得一機要披衣起立行之暇卽角射箭銜花五十步外發必中愛才惜下如不及三賜劍未嘗戮一偏裨高平知縣侯弘文者奇士也僑寓襄陽散家財募漢軍隨象昇討賊象昇移宣大弘文率募兵至楚巡撫王夢尹以擾驛聞象昇上疏救不得弘文卒遣戍天下由

是惜弘文而多象昇象昇好畜駿馬皆有名字嘗逐賊南漳敗追兵至沙河水闊數丈一躍而過卽所號五明驥也方象昇之戰歿也嗣昌遣三邏卒察其死狀其一入俞振龍者歸言象昇實死嗣昌怒鞭之三日夜且死張目曰天道神明無枉忠臣於是天下聞之莫不歎歔益恚嗣昌矣其後南都亡象觀赴水死象晉爲僧一門先後赴難者百餘人從弟象同及其部將陳安死尤烈象觀崇禎十五年鄉薦第一成進士官中書象晉象同皆諸生象昇死時年三十九

本傳

八

明大司馬盧公奏議總目

卷一

撫郾奏議

卷二

撫鄆奏議

附

撫郾檄文

撫郾公牘

卷三

撫楚奏議

明大司馬盧公奏議

卷一 總目

卷四

總理奏議

卷五

宣雲奏議

卷六

宣雲奏議

卷七

宣雲奏議

卷八

宣雲奏議

卷九

宣雲奏議

卷十

宣雲奏議

附

尺牘五首

湄隱園記

盧大司馬紀實

賈莊建祠紀畧

明大司馬盧公奏議

卷一 總目

二

盧忠肅公真像



讀
永
圖



明大司馬盧公奏議卷之一
撫鄖奏議目錄

到任謝恩疏

兵食寇情疏

爲客兵乞餉疏

入山會剿疏

請設主兵疏

鄖楚賊氛漸靖疏

停徵修城積穀疏

籌川營月餉疏

明大司馬盧公奏議卷一 目次

附投閣部揭

請令川兵北援疏

保留推官江禹緒疏

保任道臣請補要地守令疏

明大司馬盧公奏議卷之一

宜興盧象昇建斗著

襄平蔣攸銛礪堂鑒定

撫卹奏議

到任謝恩疏


欽差提督軍務兼撫治鄖陽等處地方都察院右僉都御史臣盧象昇謹奏爲恭謝天恩到任事臣原任大名道兵備按察使於崇禎七年三月十八日准吏部咨該本部等衙門會推奉旨是盧象昇陞都察院右僉都御史提督軍務兼撫治鄖陽等處地方寫敕與他欽此欽

明大司馬盧公奏議

卷一

一

遵備咨到臣臣卽恭設香案望闕叩頭謝恩隨於本月二十四日將大名道印務呈詳北直撫按批發大名府知府馬之陞暫署本月二十六日臣卽單騎啓行兼程赴任四月初八日入臣屬南陽府葉縣境內十五日抵襄陽府因舊撫臣蔣允儀尙在鄖西料理兵事臣隨馳詣承天府恭謁顯陵二十日馳回襄陽與舊撫臣面代准咨開原奉預備倉糧勅書并達字二百三十號符驗各一道令旗令牌八面副撫治鄖陽等處關防一顆會送到臣臣接管行事除地方賊情與夫兵食大計另疏奏聞外伏念臣至愚極謫備兵畿南向當流寇披猖經



年拮据雖地方得以保全無事而居官劣狀實多叨荷聖恩不加黜黜業已感激踰涯至令節鉞濫膺彌深負乘飲冰之懼況值流氛猖獗尤是忘身報國之時臣惟赤腸自矢盡心力而爲之不敢有一毫謬巧欺皇上負地方以自取罪戾也緣係恭謝天恩到任事理臣未敢擅便爲此具本

朱麟徵按唐宋大家奏疏如陸宣公歐陽文忠公蘇文忠公文內俱不載結銜明盧忠肅公諸疏每奉旨後立即將稿付梓每篇全具職名今於初任第一篇仍其原刻以志明時奏式餘概從省

明大司馬盧公奏議

卷一

二

兵食寇情疏

竊惟郎鎮僻處萬山之中割秦楚豫三方之隅以爲轄
遐考祖宗朝建官初意原以撫治流民不虞今日遂爲
五省強寇鴟張豕突之區也臣本庸劣書生重荷聖明
委任封疆多故敢愛髮膚自入境來問臣標下所設之
兵則以五百餘名計問兵終歲所需之餉則以六千餘
兩計此在承平無事不難因事補苴今當強寇縱橫未
免束手坐困其艱危窘迫之狀舊撫蔣允儀曾經屢疏
入告情形具在御前微臣受事方新正思竭犬馬之力
以上報君父若寸籌未展而呼籲徒勤謹不敢出此也

明大司馬盧公奏議

卷一

三

維是郎鎮既無主餉主兵勢必全用客兵客餉而此時
以客兵計之有鄧玘之兵有張應昌之兵有李卑曹變
蛟之兵目前兵力似堪辦賊所憂者無餉耳卽有餉而
客兵終不可久耳頃蒙皇上垂念楚疆允留餉銀十二
萬兩且睿照所及灼知郎鎮孤僻無事權也申之以通
融接濟之旨經月來舊撫臣蔣允儀殫心力以催提楚
撫臣唐暉亦殫心力以催解多方協濟僅能旦夕支持
奈楚省錢糧匱乏已竭更兼所屬郡邑相距甚遙縱令
羽檄交馳在各屬必須銖兩那湊水陸輸將往返動經
數千里甚而有藐玩不解者目下客兵行糧日費幾八

百金待用急如星火呼庚可慮應手爲難此兵食大概
也以賊情言之向自中州入楚荆襄鄖並受其害而鄖
爲甚蓋鄖屬七城皆自成化年間草創依山壘石便稱
城垣其中居民不滿數百家會不得比於他邑之村堡
況千山萬壑複道紆迴窟穴奔突賊人易逞向來賊之
大勢除入蜀入秦外其駐屯房竹保均山中者尙不下
數萬臣至襄陽卽聞監臣謝文舉孫茂霖鎮臣鄧玘張
應昌許成名及偏裨楊正芳曹變蛟等分道入山剿殺
舊撫臣蔣允儀雖料理候代猶親在行間早夜拮据今
於四月初四并十五等日鎮臣鄧玘張應昌各報有斬

明大司馬盧公奏議

卷一

四

獲前撫已經具題矣臣不敢贅目今臣既受事便當整
搦士馬援甲入山直探虎狼之穴與撫監鎮諸臣同心
戮力務期滅此朝食以報聖明知遇特恩更慮鄖襄荆
一帶北連宛雒西接漢商西南復通巴蜀皆崇山大川
曠遠綿邈現在盤踞之賊既防其封豕狂奔而遁入川
陝之賊亦恐如遊魚不定此中兵分則力量虞薄兵合
則堵截難周臣一面移會豫楚秦蜀四省撫臣各以主
客官兵扼賊要路更移請督臣陳奇瑜躬率勁旅視賊
所向而隨地奮擊之必使賊進退多阻然後可次第殄
殲此流寇情形也至若民維邦本衆志成城繇來封疆

之臣處常濟變爲朝廷宣布德意捍禦地方無不以得民心全民命奠民居爲第一義蓋圖秣馬厲兵以剿賊必先加膝置懷以撫民臣頃自南陽入境達襄耶之間見所屬郡縣連歲饑荒赤地千里加以流寇所經燔廬殺掠四野寂無人烟此而不急圖議賑議蠲恐中澤之鳴盡迫而爲潢池之弄所憂又豈止流寇哉總之今日耶疆事勢所患尙不在無兵而專在無餉所憂尙不在有賊而更在無民若耶陽府屬之房縣保康竹溪上津鄖西竹山六邑彈丸山城自罹兵燹寥寥赤子遷徙一空各縣印官非經被害卽聽處分不但無民并牧民之明大司馬盧公奏議卷一

卷一

三

官而亦無之矣又且府同缺員耶道未補臣卽竭慮焦思摩頂放踵勢難以一手一足綜兵馬錢糧之紛錯而代道府州縣以經營計銓臣念切危疆耶屬缺官必當刻期催補但恐道遠不能猝至容臣一面就近擇才酌量題請并議兵議餉與夫蠲賑事宜統俟另疏入告恭聽聖明電察施行正繕疏間據分巡下荆南道副使苗胙土呈報准四川川東道副使周士登移會入川之賊因大兵四集竄回大昌大寧巫山等處再進則爲巴東房竹等縣是羣寇又從蜀地折回耶襄一帶矣臣所遣聽用官方伯顯往偵賊情據其口報亦言賊屯老營宮

聲勢甚衆查老營宮與太和宮相近均州穀城等處在在宜防臣適於襄陽望闕謝恩到任卽日馳赴行間約同撫監鎮諸臣誓師剿賊不敢不竭此犬馬之力也

明大司馬盧公奏議

卷一

六